

comparandæ; neque hæc modo allegata est distincta quædam ratio ab hac, quam dixi fundamentum sacrificiale possidere, sed potius explicatio est causæ, cur Deus per sanguinem voluerit expiari homines, quia nimirum per animam ipsam expiatio erat facienda. Quandoquidem igitur per *sanguinem animatum* erat expiatio facienda in sacrificiis, ideo abstinere ob sacrificiorum reverentiam a sanguine omni jubebantur Noachidæ & Israelitæ. Et ita pariter cognoscere datur, rationem interdicti Noachici alias ab adversariis nostræ sententiæ propositam, *quod anima sit in sanguine, seu quod sanguis sit ipsa anima*, manu recta ducere in scholam sacrificiorum, ubi hæc ratio non tam pro argumento abstinentiæ, quam pro argumenti explicatione militat, ut clarissime licet videre. Expedio *secundo*, quod ex dictis fluit, Noachidas omnes, tam fallacem Japheti Chamique infidam DEO progeniem, quam Semi piam posteritatem, eamve quæ purum DEI cultum sectabatur, obligatos fuisse interdicto decenter obsecundare, non quod naturæ legi esus sanguinis contrariaretur, sed quod omnes & singuli obligabantur ad verum DEI cultum in sacrificiis, eorundemque fundamento, tum maximam partem consistentem. Proinde ob violationem hujus interdicti nunquam castigari gentes a DEO averfas in sacris legimus, nisi quatenus in contrarium DEO cultum & sacrificia idololatrica esum sanguinis diverterant; quin legimus potius, morticina, quæ utique a sanguine non purgata, gentibus concessa & peregrinis inter Israëlitas. Cur tamen expresse peregrinis in Israël sanguinis esus prohibeatur, manifesto liquere existimavero, quod omnis effusio sanguinis sacrificia respexerit, & sanguis extravasatus solis sacris cæremoniis in expiationem fuerit destinatus. Contra hæc, ut præcipuum cultus veri fundamentum, nequaquam fas erat peregrinum, seu profelytum domicilii, agere, licet potuerit participare de sanguine mixto suæ carni emortuæ, in quo respectus sacrificiales cessabant. Hæc facem præferunt explicando loco Levit. XVII, 10. *Homo quilibet de domo Israël*

*Israël*